

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-08-Z/17  
**Kakanj,** 30.05.2017. godine

**Z A P I S N I K**

**sa 8. redovne sjednice Općinskog vijeća održane 30.05.2017. godine (utorak) u velikoj sali za  
sastanke Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine, 8. sjednicu Općinskog vijeća otvorio je Slaven Katičić, predsjedavajući Općinskog vijeća, i pozdravio prisutne: općinske vijećnike i vijećnice, općinskog načelnika, pomoćnike općinskog načelnika, izvjestioce, obrađivače, predstavnike medija i goste.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bećirhodžić, Aldin Šljivo, Edin Aliefendić, Mejrema Purišević, Senad Alajbegović, Izudin Hrusto, Haris Veispahić, Amar Selimović, Safet Šahman, Muhamed Kubat – vijećnici- **SDA**

Semir Mušija, Rizah Haračić, Jasmin Mušanović, Mirnes Merdić i Mugdin Gorak – vijećnici **SBB BiH**

Mirsad Tursum, Rešad Merdić, Fahrudin Buza, Adisa Čehajić i Zerina Kovač – vijećnici **S BiH**

Ahmed Begić, Enes Piljug i Eldin Mijoč – vijećnici **SDP BiH**

Nusret Muslić i Sedmedin Amidić – vijećnici **DF**

Slaven Katičić i Ivica Petrović – vijećnici **HDZ BiH**

Elvedin Delić – vijećnik **A-SDA**

Mujo Fafulić – **nezavisni kandidat iz reda nacionalnih manjina.**

**Odsutni vijećnici:** Adnan Ibrahimspahić – vijećnik SDA.

Predsjedavajući je konstatirao da su na sjednici u momentu prijave prisutno 29 vijećnika i vijećnica te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

**Nermin Mandra**, općinski načelnik

**Ferdo Mijač**, sekretar Općinskog vijeća

**Enver Kusić**, sekretar općinskog organa uprave

**Mirza Fazlić**, pomoćnik općinskog načelnika za privredu, urbanizam i zaštitu okoline

**Bahrudin Arnaut**, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice – po ovlaštenju

**Džihad Berbić**, pomoćnik općinskog načelnika za finansije

**Nurčo Kurtović**, pomoćnik općinskog načelnika za imovinskopravne, geodetske poslove i katastar nekretnina

**Nurudin Hrusto**, pomoćnik općinskog načelnika za civilnu zaštitu

**Rešad Zaimović**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Zijad Neimarlija**, direktor Zavoda za planiranje i izgradnju općine Kakanj

**Vesna Ajanović**, općinska pravobraniteljica

## Izvjestioci, obrađivači, gosti

**Mirnes Bajtarević** – direktor JP „Grijanje“ d.o.o. Kakanj

**Fakir Ajdinović** – direktor JU Centar za socijalni rad Kakanj

**Mehmedalija Velispahić** – predsjednik UO JU Centar za socijalni rad Kakanj

## Predstavnici medija:

**NTV IC Kakanj**

**Radio Kakanj**

**„Kakanjske novine“**

**„Naša riječ“**

**„Kakanjlive“**

**„Kakanj-x“**

**„Kaportal“**

Kratka saopćenja o radu sjednice i prethodnim pitanjima:

Predsjedavajući je rekao da je, u pripremi 8. redovne sjednice Općinskoga vijeća, Kolegij Općinskog vijeća 22.05.2017.godine održao 7. sjednicu na kojoj je pored utvrđivanja termina za 8. redovnu sjednicu Vijeća razmatrao: Odluku o dopuni Odluke o naknadama općinskih vijećnika i radnih tijela Vijeća, Inicijativu za zaključivanje Kolektivnog ugovora o pravima i obavezama poslodavca i radnika u JP „Vodokom“ d.o.o. Kakanj, Izvještaj o radu Drugostepene komisije za žalbe za period januar-april 2017.godine sa prijedlogom zaključka o visini naknade za članove Komisije, Peticiju mještana MZ Brnj protiv Odluke o utvrđivanju javnog interesa u svrhu odlaganja otkrivke iz površinskog kopa „Vrtlište“ na vanjsko odlagalište „Bijele Vode“, Zahtjev Udruženja Savez poljoprivrednih udruženja „Kakanjska poljoprivreda“, Informaciju Službe za društvene djelatnosti, boračka pitanja, raseljena lica, izbjeglice i povratnike po Žalbi/Molbi Nerme Đino i Ponudu otkupa dijela tiraža knjige „Svjedok vremena“ Raifa Čehajića.

Kolegij je odlučio da se napravi novi prijedlog odluke o izmjenama i dopunama Odluke o naknadama općinskih vijećnika i radnih tijela Vijeća da bi se izmjenom tretirao i član 5.postojeće Odluke, kako bi Odluka bila preciznija i jasnija.

Inicijativu za zaključivanje Kolektivnog ugovora o pravima i obavezama poslodavca i radnika u JP „Vodokom“ d.o.o. Kakanj Kolegij pozdravlja i ista je shvaćena kao dobronamjeran prijedlog, ali kako ista u pogledu legitimacije za zaključivanje ugovora sadrži nedostatke, potrebno je prethodno dostaviti jasan dokaz o reprezentativnosti Sindikata JP „Vodokom“ ili Sindikata komunalne privrede općine Kakanj. Također, Kolegij je mišljenja da Sindikat JP „Vodokom“ treba da sa ovim prijedlogom upozna upravu preduzeća i obavi potrebne konsultacije.

Izvještaj o radu Drugostepene komisije za žalbe za period januar-april 2017.godine će se uvrstiti u dnevni red 8.sjednice Općinskog vijeća.

Peticiju mještana MZ Brnj protiv Odluke o utvrđivanju javnog interesa u svrhu odlaganja otkrivke iz površinskog kopa „Vrtlište“ na vanjsko odlagalište „Bijele Vode“ Kolegij Općinskog vijeća je proslijedio Službi za imovinskopravne, geodetske poslove i katastar nekretnina uz zaključak da navedena služba u saradnju sa RMU Kakanj organizira sastanak na kojem će mještanima ove MZ prezentirati svoje planove na ovom području i iznijeti razloge donošenja naprijed navedene Odluke.

Zahtjev Udruženja Savez poljoprivrednih udruženja „Kakanjska poljoprivreda“ je proslijeđen Službi za privredu, urbanizam i zaštitu okoline na dalje postupanje.

Informacija Službe za društvene djelatnosti, boračka pitanja, raseljena lica, izbjeglice i povratnike po Žalbi/Molbi Nerme Đino je primljena k znanju.

U vezi Ponude otkupa dijela tiraža knjige „Svjedok vremena“ Raifa Čehajića Kolegij je dao pojašnjenje da u Budžetu Općine Kakanj za 2017.godinu, na poziciji Općinskog vijeća nema raspoložive stavke kojom bi Vijeće moglo otkupiti dio tiraža. Kolegij je odlučio da Ponudu proslijedi svim vijećnicima u materijalima za 8.sjednicu Vijeća.

## Usvajanje zapisnika sa 7. sjednice Općinskog vijeća

Predsjedavajući je zapisnik sa 7. sjednice Vijeća stavio na razmatranje. Pošto nije bilo prijavljenih diskutanata, predsjedavajući je nakon glasanja konstatirao da je isti usvojen sa 28 glasova za, niko protiv i niko uzdržan.

## Komentari na dostavljene odgovore na vijećnička pitanja:

**Enes Piljug:** je rekao da je iz odgovora na njegovo vijećničko pitanje evidentno da su sve aktivnosti na putnoj komunikaciji Subotnje – Brnjic obustavljene zbog sanacije klizišta, te dodao da smatra da se aktivnosti trebaju što prije započeti kako bi se izbjegli naknadni problemi.

## Vijećnička pitanja

**Jasmin Mušanović:** 1. „Kada se može očekivati postavljanje podzemnih kontejnera u blizini zgrada poznatih kao M-ovi?“ 2. „Ko je nadležan za održavanje čistoće na dječjim igralištima?“

**Semir Mušija:** „U kojem statusu se nalazi odluka o uslovima i načinu držanja pasa?“

## Vijećničke inicijative:

**Mejrema Purišević:** „Podnosim vijećničku inicijativu za postavljanje podzemnih kontejnera u naselju Zgošća uz glavnu saobraćajnicu.“

**Rizah Haračić:** 1. „Pokrećem vijećničku inicijativu za rješavanje problema rasvjete u MZ Bičer - podružnica Bičer.“

2. „Pokrećem vijećničku inicijativu za postavljanje usporivača brzine tzv. ležećih policajaca u ul. Željeznička (MZ Bičer – MZ Doboje) na potezu od propusta do pješačkog prelaza preko autoputa A1 (pasarela) i na potezu od prelaza preko željezničke pruge do propusta.“

**Jasmin Mušanović:** „Molio bih da se provjeri da li ja tačno da nedjeljom nema autobusne povezanosti između Kaknja i Zenice.“

**Edin Aliefendić:** „Pokrećem vijećničku inicijativu za uređenje i obilježavanje javnih parking površina u ulici Alije Izetbegovića u neposrednoj blizini nove administrativne zgrade Općine Kakanj, tačnije kod stambene zgrade soliter II i stambene zgrade lamela niz A.“

**Elvedin Delić:** 1. „Upućujem vijećničku inicijativu Zavodu za planiranje i izgradnju općine Kakanj da se autobusko stajalište, blizu O.Š. „Hamdija Kreševljaković“, produži, proširi, pomjeri kiosk.“ 2. „Upućujem vijećničku inicijativu Zavodu za planiranje i izgradnju općine Kakanj da se ulica koja prolazi ispod bolnice, pored Stare jame i ide prema pijaci, preciznije od baraka kod Stare jame do uključenja na cestu blizu Besta, cca 200 m proširi (naspe i asfaltira).“

**Semir Mušija:** „Pokrećem vijećničku inicijativu da se u ulici 1. maj – Bare, odnosno u dijelu ulice koja se nalazi preko puta kuće dr. Spasojevića, postave 3 rasvjetna tijela (sijalice).“

**Enes Piljug:** „Pokrećem vijećničku inicijativu da se u centru Kaknja, tačnije na Sahat kuli postavi displej, na kojem će se moći vidjeti tačna mjerenja zagađenosti zraka, temperaturu zraka i tačno vrijeme.“

**Sedmedin Amidić:** „Vijećnička inicijativa odnosi se na priključenje kanalizacione mreže u kanalizacioni sistem koji se nalazi na lokalitetu MZ Kakanj II. Radi se o mještanima Vrbice koji imaju problem sa odvodnjom kanalizacije.“

**Fahrudin Buza:** „Da se izda nalog za rušenje stabla platana u maloj aleji ispod objekta “Ella1“ na putu prema Domu zdravlja.“

**Nusret Muslić:** „Inicijativu upućujem prema nadležnim službama, za obustavljanje svih aktivnosti i radova na putnoj infrastrukturi a koja se tiče popravki i sječenja starog asfalta i krpaža istog – izuzev kritičnih udarnih rupa.“

**Amar Selimović:** „Pokrećem vijećničku inicijativu za zamjenu rasvjetnih tijela (3) na mostu u Bilješevu i adekvatno farbanje ograde na mostu te sanaciju rešetke na mostu.“

## Utvrđivanje dnevnog reda

Predsjedavajući je za današnju sjednicu predložio dnevni red (po pozivu) koji je usaglašen na sjednici Kolegija Općinskog vijeća održanoj 22.05.2017. godine. U međuvremenu je pristiglo još materijala prijedlog odluke o izmjeni i dopuni Programa i utroška sredstava od koncesionih naknada (2), prijedlog odluke o utvrđivanju javnog interesa u svrhu izgradnje hidrotehničkih objekata u dolini rijeke Ribnice – prelivni kanal i vanjskog odlagališta „Ribnica“ (5), prijedlog rješenja o utvrđivanju prava vlasništva u korist

Kapo (Ahme) Hate iz Kaknja (18) a prijedlog odluke o izmjeni i dopunama Odluke o naknadama vijećnika i drugih radnih tijela Vijeća (3) nije dobio suglasnost na sjednici Kolegija da se uvrsti u dnevni red, ali je Stručna služba za poslove Općinskog vijeća isti sačinila i dostavila vijećnicima po zaključku Kolegija Općinskog vijeća. Također, na intervenciju predlagača preimenovat će se tačka 16. prijedlog rješenja o konačnom imenovanju članova UO JU „Dom zdravlja“ Kakanj i glasit će prijedlog rješenja o *privremenom* imenovanju članova UO JU „Dom zdravlja“ Kakanj.

Predsjedavajući je prijedložio da se navedeni prijedlozi uvrste u dnevni red i isti stavio na razmatranje i usvajanje. Dnevni red usvojen je sa 21 glasom za, 5 protiv i 1 uzdržan.

### **Usvojeni dnevni red:**

1. Razmatranje Izvještaja o izvršenju Budžeta Općine Kakanj za period 01.01-31.03.2017.godine
2. Prijedlog odluke o izmjeni i dopuni Programa utroška sredstava od koncesionih naknada
3. Prijedlog odluke o izmjeni i dopunama Odluke o naknadama općinskih vijećnika i radnih tijela Vijeća
4. Prijedlog odluke o utvrđivanju javnog interesa na nekretninama koje se nalaze K.O. Donji Kakanj
5. Prijedlog odluke o utvrđivanju javnog interesa u svrhu izgradnje hidrotehničkih objekata u dolini rijeke Ribnice – prelivni kanal i vanjskog odlagališta „Ribnica“
6. Prijedlog odluke o načinu i uslovima raspolaganja nekretninom – zamjena zemljišta sa Islamskom zajednicom u BiH – Medžlis Islamske zajednice Kakanj
7. Prijedlog odluke o raspisivanju i održavanju izbora za članove savjeta mjesnih zajednica općine Kakanj
8. Prijedlog rješenja o imenovanju Komisije za provođenje izbora u mjesnim zajednicama općine Kakanj
9. Prijedlog odluke o izmjenama i dopunama Odluke o finansiranju i postupku izbora i prijema volontera
10. Prijedlog rješenja o imenovanju članova Komisije za provođenje procedure izbora lica na stručnom osposobljavanju bez zasnivanja radnog odnosa
11. Prijedlog teksta Autentičnog tumačenja Odluke o izmjeni Odluke o provođenju Prostornog plana općine Kakanj za period 2010-2030. i Odluke o izmjeni Odluke o provođenju Urbanističkog plana općine Kakanj za period 2011-2026.
12. Razmatranje Izvještaja o radu JU Centar za socijalni rad Kakanj sa finansijskim izvještajem za 2016.godinu
13. Razmatranje Izvještaja o radu JU „Dom zdravlja“ Kakanj sa Izvještajem o materijalno-finansijskom poslovanju JU „Dom zdravlja“ Kakanj za 2016.godinu
14. Razmatranje Plana rada i razvoja JU Dom zdravlja Kakanj za 2017.godinu
15. Razmatranje Izvještaja o zdravstvenom stanju stanovništva općine Kakanj i epidemijama u 2016.godini
16. Prijedlog rješenja o privremenom imenovanju članova UO JU „Dom zdravlja“ Kakanj
17. Prijedlog rješenja o utvrđivanju prava vlasništva u korist Mušija (Esada) Nermina iz Kaknja
18. Prijedlog rješenja o utvrđivanju prava vlasništva u korist Kapo (Ahme) Hate iz Kaknja
19. Razmatranje Izvještaja o radu Drugostepene komisije za žalbe za period januar-april 2017.godine
20. Prijedlog rješenja o imenovanju predsjednika Drugostepene komisije za žalbe

### **Tačka 1.**

#### **Razmatranje Izvještaja o izvršenju Budžeta Općine Kakanj za period 01.01-31.03. 2017. godine**

Predlagač: općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

Za raspravu se nije prijavio niko pa je predsjedavajući Izvještaj o izvršenju Budžeta Općine Kakanj za period 01.01-31.03. 2017. godine stavio na glasanje i nakon glasanja konstatirao da je isti usvojen sa 23 glasa za, 5 protiv i niko uzdržan.

### **Tačka 2.**

#### **Prijedlog odluke o izmjeni i dopuni Programa utroška sredstava od koncesionih naknada**

Predlagač: općinski načelnik

Obradivač: Zavod za planiranje i izgradnju općine Kakanj  
Izjavitelj: Zijad Neimarlija, direktor Zavoda

Za raspravu se nije prijavio niko pa je predsjedavajući prijedlog odluke o izmjeni i dopuni Programa utroška sredstava od koncesionih naknada stavio na glasanje i nakon glasanja konstatirao da je isti usvojen sa 26 glasova za, niko protiv i niko uzdržan.

### **Tačka 3.**

#### **Prijedlog odluke o dopuni Odluke o naknadama općinskih vijećnika i radnih tijela Vijeća**

Obradivač: Stručna služba za poslove Općinskog vijeća  
Stav i mišljenje: Komisija za Statut i propise

U diskusiji je učestvovao Nusret Muslić.

**Nusret Muslić:** je predložio da se u članu 3. doda stav 4. koji glasi: „Vijećnički paušal umanjuje se za 50% za svakog vijećnika za koga se utvrdi da u toku dvije uzastopne sjednice Općinskog vijeća nije uzeo učešće u raspravama i inicijativama te svojom aktivnošću nije doprinio poboljšanju i unapređenju kvalitete rada Općinskog vijeća.“ Klub vijećnika DF je mišljenja da nije dovoljno samo prisustvovati sjednici već se treba aktivno uključiti u rad Vijeća.

Predsjedavajući je amandman vijećnika Muslića stavio na glasanje i nakon glasanja konstatirao da isti nije usvojen sa 5 glasova za, 3 protiv i 21 uzdržan.

Predsjedavajući je prijedlog odluke o dopuni Odluke o naknadama općinskih vijećnika i radnih tijela Vijeća stavio na glasanje i nakon glasanja konstatirao da je isti usvoj sa 21 glasom za, 6 protiv i 2 uzdržana.

### **Tačka 4.**

#### **Prijedlog odluke o utvrđivanju javnog interesa na nekretninama koje se nalaze K.O. Donji Kakanj**

Predlagač: Općinski načelnik;  
Obradivač: Služba za imovinskopravne, geodetske poslove i katastar nekretnina;  
Izjavitelj: Nurčo Kurtović, pomoćnik općinskog načelnika;  
Stav i mišljenje: Komisija za Statut i propise, Komisija za ekologiju, Komisija za ljudska prava i ravnopravnost spolova

**Nurčo Kurtović:** je rekao da se tekst prijedloga i 4.i 5. tačke dnevnog reda, na intervenciju općinske pravobraniteljice, mijenja tako da će se u članovima 1. i 2. iza riječi „svrhu“ dodati riječi „preduzimanja mjera i aktivnosti na ispuštanju vode iz akumulacije, nastale uslijed pojave klizišta deponije jalovine, a radi otklanjanja posljedica tehnološke nesreće“ a riječ „izgradnje“ mijenja se u oblik „izgradnjom“.

U diskusiji su učestvovali: Enes Piljug i Edin Aliefendić.

**Enes Piljug:** je rekao da klub vijećnika SDP-a traži detaljnije pojašnjenje u vezi ove odluke, kao i očitovanje RMU po ovom pitanju. Upitao šta će se desiti sa područjem Mramora odnosno da li će se u sklopu ove odluke rješavati i to pitanje.

**Nurčo Kurtović:** je rekao da je zahtjev upućen od strane RMU Kakanj i sva dodatna pojašnjenja bi se mogla tražiti samo od njih.

**Općinski načelnik:** je pojasnio da je iz obrazloženja evidentno da će se graditi kanal preko klizišta kako bi se ispustila voda iz akumulacije da bi se mogli nastaviti radovi na tunelu. U ovoj odluci daje se saglasnost RMU, Elektoprivredi BiH, za izgradnju objekta zbog Zakona o zaštiti i spašavanju a činjenica jest da ovaj operater ne plaća koncesije i faktički radi bez dozvole za rad. Donošenjem ovakvih odluka dozvoljava se nelegalna eksploatacija, a kako Vijeće ne bi došlo u situaciju da nelegalnu odluku donese, u prijedlogu se eksplicitno govori samo o elementarnoj nepogodi. Kontradiktorno je da ovakvim ustupkom Općina dozvoljava i podržava rad RMU Kakanj dok u isto vrijeme vodi parnični postupak protiv Elektoprivrede zbog neplaćanja koncesija. Na ovaj način Općina Kakanj daje punu podršku razvoju energetskog sektora i razvoju ovog preduzeća, a s druge strane naglašava koncesionu zakonsku obavezu koju Elektoprivreda ima prema Općini.

**Edin Aliefendić:** je upitao pomoćnika načelnika vezano za put (općinsko vlasništvo) uz parcele do džamije (na lijevoj strani idući od Kaknja), odnosno da li će biti potrebe da se i on ekspropirira.

**Enes Piljug:** se zahvalio načelniku na obrazloženju te upitao zašto će se ekspropirirati parcele kad dionica kanala ide kuda je išla i rijeka Ribnica.

**Nurčo Kurtović:** je rekao da je ovaj prijedlog odluke ograničen zahtjevom RMU Kakanj i s te strane o potrebama ovog preduzeća i daljoj eksproprijaciji se ne može više reći.

Predsjedavajući je prijedlog odluke o utvrđivanju javnog interesa na nekretninama koje se nalaze K.O. Donji Kakanj uz izmjenju koju je pomoćnik Kurtović izložio u uvodnom izlaganju stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

#### **Tačka 5.**

**Prijedlog odluke o utvrđivanju javnog interesa u svrhu izgradnje hidrotehničkih objekata u dolini rijeke Ribnice – prelivni kanal i vanjskog odlagališta „Ribnica“**

Predlagač: Općinski načelnik;

Obrađivač: Služba za imovinskopravne, geodetske poslove i katastar nekretnina;

Izjavitelj: Nurčo Kurtović, pomoćnik općinskog načelnika;

Predsjedavajući je prijedlog odluke o utvrđivanju javnog interesa u svrhu izgradnje hidrotehničkih objekata u dolini rijeke Ribnice – prelivni kanal i vanjskog odlagališta „Ribnica“ uz izmjenju koju je pomoćnik Kurtović izložio u uvodnom izlaganju stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

#### **Tačka 6.**

**Prijedlog odluke o načinu i uslovima raspolaganja nekretninom – zamjena zemljišta sa Islamskom zajednicom u BiH – Medžlis Islamske zajednice Kakanj**

Predlagač: Općinski načelnik;

Obrađivač: Služba za imovinskopravne, geodetske poslove i katastar nekretnina;

Izjavitelj: Nurčo Kurtović, pomoćnik općinskog načelnika;

Stav i mišljenje: Komisija za Statut i propise

U raspravi o ovoj tački dnevnog reda nije niko učestvovao pa je predsjedavajući prijedlog odluke o načinu i uslovima raspolaganja nekretninom – zamjena zemljišta sa Islamskom zajednicom u BiH – Medžlis Islamske zajednice Kakanj stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

#### **Tačka 7.**

**Prijedlog odluke o raspisivanju i održavanju izbora za članove savjeta mjesnih zajednica općine Kakanj**

#### **Tačka 8.**

**Prijedlog rješenja o imenovanju Komisije za provođenje izbora u mjesnim zajednicama općine Kakanj**

Predlagač: Općinski načelnik;

Obrađivač: Služba za opću upravu, radne i zajedničke poslove, lokalnu samoupravu i mjesne zajednice;

Izjavitelj: Bahrudin Arnaut, pomoćnik općinskog načelnika

U diskusiji su učestvovali: Haris Veispahić, Rizah Haračić, Semir Mušija.

**Haris Veispahić:** je predložio da se u Komisiju za sprovođenje izbora u mjesnim zajednicama imenuju državni službenici i namještenici.

**Rizah Haračić:** je rekao da nema primjedbi na prijedlog odluke već na sam rad mjesnih zajednica koje bi prvenstveno trebale biti podrška Općini Kakanj. Problematizirao je način rada mjesnih zajednica i predložio da se u odluku ugrade odredbe koje će vremenski ograničiti rok za formiranje savjeta mjesne zajednice i na taj način poboljšati rad ovih tijela podrške Općini.

**Semir Mušija:** je tražio od obrađivača dodatno pojašnjenje u vezi dijela prijedloga odluke koji se tiče sastava Komisije, odnosno da se precizira koji će broj državnih službenika biti u Komisiji.

**Bahrudin Arnaut:** je rekao da je način rada mjesnih zajednica preciziran u Statutu Općine Kakanj i Statutima mjesnih zajednica. Obaveza članova odbora mjesnih zajednica je da se sastaju svaka 3 mjeseca. U vezi članova Komisije rekao je da je dosad bila praksa da u Komisiji ispred organa uprave bude jedan državni službenik i sekretar Komisije. Također, dodao je da je kompletna procedura već zadana i da će, onog momenta kad sve otpočne, koraci u postupku sami jedan iz drugog proizlaziti.

**Rizah Haračić:** je ponovio da se odlukom ograniči rok za formiranje savjeta mjesnih zajednica, a ukoliko se

rok ne ispoštuje, da se savjet smijeni.

**Općinski načelnik:** se složio sa diskusijom vijećnika Haračića da se ta odredba ugradi ali ne u prijedlog odluke o raspisivanju izbora u mjesnim zajednicama. Mjesne zajednice su jako bitne Općini Kakanj naročito za implementaciju raznih projekata i u interesu je svih da njihov rad bude efikasan i efektan.

**Predsjedavajući:** je predložio da se ovi zahtjevi oko rada mjesnih zajednica preciziraju zaključkom i da se napravi pauza.

Usljedila je pauza od 20' u radu Vijeća radi sastanka Kolegija Općinskog vijeća.

Nakon pauze, pomoćnik općinskog načelnika, Bahrudin Arnaut je pročitao zaključak kojim se obavezuje nadležna služba da izradi prijedlog statuta mjesnih zajednica kako bi se povećala efikasnost rada organa mjesne zajednice.

Predsjedavajući je prijedlog odluke o raspisivanju i održavanju izbora za članove savjeta mjesnih zajednica općine Kakanj uz zaključak stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

Predsjedavajući je rekao da Kolegij nije mogao postići saglasnost po pitanju sastava Komisije te pozvao načelnika da pročita prijedlog.

**Općinski načelnik:** je predložio 5 članova u sastav Komisije: Sedin Karahodžić – predsjednik, Alisa Bećirhodžić, Meliha Neimarlija, Bahrudin Arnaut i Marijana Tomičić – članovi. Članovi će poslove obavljati u radno vrijeme bez nakande za rad. Ukoliko rad bude predviđen u dane vikenda bit će evidentiran kao prekovremeni za preraspodjelu bez finansijske naknade.

Usljedila je pauza od 5' na zahtjev kluba vijećnika SBB-a.

Predsjedavajući je prijedlog rješenja o imenovanju Komisije za provođenje izbora u mjesnim zajednicama općine Kakanj stavio na glasanje i nakon glasanja konstatirao da je isti usvojen sa 24 glasa za, niko protiv i 4 uzdržana.

#### **Tačka 9.**

**Prijedlog odluke o izmjenama i dopunama Odluke o finansiranju i postupku izbora i prijema volontera**

Predlagač: Općinski načelnik;

Obrađivač: Služba za opću upravu, radne i zajedničke poslove, lokalnu samoupravu i mjesne zajednice;

Izvjestilac: Bahrudin Arnaut, pomoćnik općinskog načelnika;

Stav i mišljenje: Komisija za ljudska prava i ravnopravnost spolova, Komisija za mlade, Komisija za Statut i propise

Pošto nije bilo prijavljenih diskutanata predsjedavajući je prijedlog odluke o izmjenama i dopunama Odluke o finansiranju i postupku izbora i prijema volontera stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

#### **Tačka 10.**

**Prijedlog rješenja o imenovanju članova Komisije za provođenje procedure izbora lica na stručnom osposobljavanju bez zasnivanja radnog odnosa**

Predlagač: Komisija za izbor i imenovanja,

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izvjestilac: Edin Aliefendić, predsjednik Komisije za izbor i imenovanje

**Edin Aliefendić:** je pročitao prijedlog sastava Komisije kako slijedi - Edin Bjelopoljak, predsjednik; Almedin Kovač, Ajla Kurešepi, Emina Veispahić, Izudin Hrusto, Ilhana Alajbegović, Slaven Katičić, Aldin Merdić, Senaid Begić.

Prijedlog je predsjedavajući stavio na glasanje i nakon glasanja konstatirao da je isti usvojen jednoglasno sa 29 glasova za, niko protiv i niko uzdržan.

#### **Tačka 11.**

**Prijedlog teksta Autentičnog tumačenja Odluke o izmjeni Odluke o provođenju Prostornog plana općine Kakanj za period 2010-2030. i Odluke o izmjeni Odluke o provođenju Urbanističkog plana Kaknja 2011-2026.**

Predlagač: Komisija za Statut i propise

Kako o ovom prijedlogu nije bilo rasprave, predsjedavajući je prijedlog teksta Autentičnog tumačenja Odluke o izmjeni Odluke o provođenju Prostornog plana općine Kakanj za period 2010-2030. i Odluke o izmjeni Odluke o provođenju Urbanističkog plana Kakanja 2011-2026. stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

### **Tačka 12.**

#### **Razmatranje Izvještaja o radu JU Centar za socijalni rad Kakanj sa finansijskim Izvještajem za 2016. godinu**

Predlagač: UO JU Centar za socijalni rad

Obrađivač: UO JU Centar za socijalni rad

Izjestilac: Fakir Ajdinović, direktor JU i Mehmedalija Velispahić, predsjednik UO JU

Obzirom da nije bilo rasprave, predsjedavajući je Izvještaj o radu JU Centar za socijalni rad Kakanj sa finansijskim Izvještajem za 2016. godinu stavio na glasanje i nakon glasanja konstatirao da je isti usvojen jednoglasno sa 29 glasova za, niko protiv i niko uzdržan.

### **Tačka 13.**

#### **Razmatranje Izvještaja o radu JU Dom zdravlja Kakanj sa Izvještajem o materijalno-finansijskom poslovanju JU Dom zdravlja Kakanj za 2016. godinu**

Predlagač: UO JU Dom zdravlja Kakanj

Obrađivač: UO JU Dom zdravlja Kakanj

Izjestilac: Mirsad Tursum, direktor JU, Abdulah Imamović, predsjednik UO JU – opravdao odsustvo

Stav i mišljenje: Zdravstveni savjet

**Ahmed Begić:** je rekao da će klub vijećnika SDP-a podržati predmetni Izvještaj i da JU Dom zdravlja Kakanj najkvalitetnije radi s obzirom na uslove u kojima radi, na način finansiranja zdravstvenih usluga od strane Zavoda za zdravstveno osiguranje, te s obzirom i na odnos Vijeća kao osnivača prema JU Dom zdravlja Kakanj, istakavši da još uvijek nije riješeno finansiranje hitne medicinske pomoći. Predložio je menadžmentu JU Dom zdravlja Kakanj da pokuša da period čekanja na dijagnostičke pretrage kao što su npr. radiološke pretrage, svede na najmanju moguću mjeru jer svakom liječenju prethodi dijagnostika.

**Ivica Petrović:** je rekao da će klub vijećnika HDZ-a podržati Izvještaj o radu JU Dom zdravlja Kakanj, te uputio pohvale direktoru JU Dom zdravlja Kakanj.

Nakon rasprave predsjedavajući je Izvještaj o radu JU Dom zdravlja Kakanj sa Izvještajem o materijalno-finansijskom poslovanju JU Dom zdravlja Kakanj za 2016. godinu stavio na glasanje i nakon glasanja konstatirao da je isti usvojen sa 27 glasova za, niko protiv i niko uzdržan.

### **Tačka 14.**

#### **Razmatranje Plana rada i razvoja JU Dom zdravlja Kakanj za 2017.godinu**

Predlagač: UO JU Dom zdravlja Kakanj

Obrađivač: UO JU Dom zdravlja Kakanj

Izjestilac: Mirsad Tursum, direktor JU, Abdulah Imamović, predsjednik UO JU

Stav i mišljenje: Zdravstveni savjet

Kako nije bilo rasprave, predsjedavajući je Plan rada i razvoja JU Dom zdravlja Kakanj za 2017. godinu stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

### **Tačka 15.**

#### **Razmatranje Izvještaja o zdravstvenom stanju stanovništva općine Kakanj i epidemijama u 2016. godini**

Predlagač: UO JU Dom zdravlja Kakanj

Obrađivač: UO JU Dom zdravlja Kakanj

Izjestilac: Mirsad Tursum, direktor JU, Ibrahim Aličković, šef HES-a

Stav i mišljenje: Zdravstveni savjet, Komisija za ljudska prava i ravnopravnost spolova

**Ahmed Begić:** je rekao da do sada Vijeće nije iskazalo želju za promocijom i prevencijom zdravlja, nego



da se uglavnom sve zasnivalo na liječenju posljedica. Stoga je htio ukazati odnosno utjecati na svijest vijećnika da se radi na tome da se smanji npr. aerozagađenje, da se vodi računa o zagađenosti vode obzirom da 71 % lokalnih vodovoda ima zagađenu vodu, zatim na rješavanju kanalizacija itd. a sve iz razloga što se zdrava populacija može imati samo prevencijom i promocijom zdravlja.

**Rizah Haračić:** je rekao da je dr. Ibrahim Aličković u svom izlaganju govorio i o vakcinaciji, te istakao da je poznato da vlada veliki strah u vezi vakcinisanja i da mladi imaju različite informacije koje se odnose na cijepljenje, te predložio da ljekari daju veći doprinos u promociji vakcinisanja uz finansijsku podršku Općine Kakanj, njihovoj sigurnoj primjeni itd., a sve kako bi se povećao procenat vakcinacije.

Predsjedavajući je nakon iscrpljene rasprave prijedlog Izvještaja o zdravstvenom stanju stanovništva općine Kakanj i epidemijama u 2016. godini stavio na glasanje i nakon glasanja konstatirao da je isti usvojen sa 28 glasova za, niko protiv i niko uzdržan.

#### **Tačka 16.**

##### **Prijedlog rješenja o privremenom imenovanju članova UO JU Dom zdravlja Kakanj**

Predlagač: Komisija za izbor i imenovanja

Obrađivač: Komisija za raspisivanje i provođenje javnog oglasa za izbor predsjednika i članova UO JU Dom zdravlja Kakanj

Izjavitelj: Enver Kusić, predsjednik Komisije za raspisivanje i provođenje javnog oglasa za izbor predsjednika i članova UO JU Dom zdravlja Kakanj

**Edin Aliefendić:** je u svojstvu predsjednika Komisije za izbor i imenovanje tražio 10' pauze, te je nakon pauze rekao da Komisija za izbor i imenovanja, nakon konsultacija, predlaže za predsjednika Nisveta Traku, a za članove Nijaza Đokića i Saliha Hasagića.

**Rizah Haračić:** je rekao da prijedlog koji je iznio predsjednik Komisije nije jednoglasan, obzirom da je jedan član bio protiv, te da je prijedlog kluba SBB-a da u sastav Komisije bude biran Irfan Mešić i da se o ovom prijedlogu Vijeće izjasni.

Predsjedavajući je rekao da će se prvo glasati o prijedlogu Komisije, a potom ukoliko se isti ne usvoji, o prijedlogu kluba SBB-a.

Nakon glasanja o prijedlogu Komisije za izbor i imenovanja o privremenom imenovanju članova UO JU Dom zdravlja Kakanj, predsjedavajući je konstatirao da je isti usvojen sa 19 glasova za, 10 protiv i niko uzdržan, te da se Vijeće neće izjašnjavati o prijedlogu kluba SBB-a.

#### **Tačka 17.**

##### **Prijedlog rješenja o utvrđivanju prava vlasništva u korist Nermina (Esada) Mušija iz Kaknja**

Predlagač: Općinski načelnik

Obrađivač: Služba za imovinskoppravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Pošto nije bilo prijavljenih za raspravu, predsjedavajući je prijedlog rješenja o utvrđivanju prava vlasništva u korist Nermina (Esada) Mušija iz Kaknja, stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

#### **Tačka 18.**

##### **Prijedlog rješenja o utvrđivanju prava vlasništva u korist Hate (Ahme) Kapo iz Kaknja**

Predlagač: Općinski načelnik

Obrađivač: Služba za imovinskoppravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Pošto nije bilo prijavljenih za raspravu, predsjedavajući je prijedlog rješenja o utvrđivanju prava vlasništva u korist Hate (Ahme) Kapo iz Kaknja, stavio na glasanje i nakon glasanja konstatirao da je isti usvojen sa 29 glasova za, niko protiv i niko uzdržan.

### **Tačka 19.**

#### **Razmatranje Izvještaja o radu Drugostepene komisije za žalbe za period januar-april 2017. godine**

Predlagač: Drugostepena komisija za žalbe

Obrađivač: Drugostepena komisija za žalbe

Izjavitelj: Aid Terzić, Elvedin Mamela – članovi Komisije

Kako nije bilo prijavljenih za raspravu, predsjedavajući je Izvještaj o radu Drugostepene komisije za žalbe za period januar-april 2017. godine sa zaključkom o utvrđivanju naknade članovima Komisije stavio na glasanje i nakon glasanja konstatirao da je isti usvojen sa 27 glasova za, niko protiv i 1 glas uzdržan.

### **Tačka 20.**

#### **Prijedlog rješenja o imenovanju predsjednika Drugostepene komisije za žalbe**

Predlagač: Komisija za izbor i imenovanja

Izjavitelj: Edin Aliefendić, predsjednik Komisije

Usljedila je pauza od 2'.

Edin Aliefendić je za predsjednika Drugostepene komisije za žalbe, ispred Komisije za izbor i imenovanja, predložio dva kandidata Dinu Mimića i Čobo Esmira, sa prijedlogom da se izjašnjavanje o ovim kandidatima obavi odvojeno.

Prvo se pristupilo glasanju za kandidata Dinu Mimića, te je predsjedavajući nakon glasanja konstatirao da isti nije dobio potrebnu većinu sa 5 glasova za, 6 glasova protiv i 17 uzdržanih.

Zatim se pristupilo glasanju za kandidata Esmira Čobu, te je predsjedavajući nakon glasanja konstatirao da je isti prihvaćen sa 19 glasova za, 9 glasova protiv i 1 glas uzdržan.

Predsjedavajući se zahvalio svim prisutnim i zaključio rad 8. redovne sjednice Općinskoga vijeća

Sjednica je završena u 12:52 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog zapisnika.

**SEKRETAR  
OPĆINSKOG VIJEĆA**  
Ferdo Mijač

---

**PREDSJEDAVAJUĆI  
OPĆINSKOG VIJEĆA**  
Slaven Katičić

---